



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

12.03.2021թ.

**Ո Ր Ո Շ ՈՒ Մ**  
**ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ**  
**ՔՆՆՈՂ ԱՆՁԻ**  
**թիվ ԳԲՔԱ-ԼՕ-2021/10**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի  
Քարտուղարությամբ՝ Ռ. Մկրտչյանի

Պատվիրատու՝ «Կառլեն Եսայանի անվան պոլիկլինիկա» ՓԲԸ  
Բողոք բերող՝ «Տրանս-Սֆեր» ՍՊԸ

Գնման ընթացակարգի ծածկագիրը և առարկան՝  
«ԿԵԱՊ-ԳՀԾՁԲ-ԱՆՎՏ-21/14» ծածկագրով գնանշման հարցման ընթացակարգ,  
պահնորդական ծառայությունների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ  
քննող անձ)՝ քննության առնելով «Տրանս-Սֆեր» ՍՊԸ-ի (այսուհետ նաև՝ Ընկերություն)  
կողմից 25.02.2021թ.-ին ներկայացրած բողոքը (այսուհետ նաև՝ Բողոք) և կից  
փաստաթղթերը,

**Պ Ա Ր Զ Ե Ց**

**1. Գործի նախապատմությունը**

Դիմելով ՀՀ գնումների հետ կապված բողոքներ քննող անձին՝ Ընկերությունը ներկայացրած բողոքով խնդրել է՝

1. Կասեցնել «ԿԵԱՊ-ԳՀԾՁԲ-ԱՆՎՏ-21/14» գնման ընթացակարգը և պատվիրատուին արգելել կատարել որոշակի գործողություններ, պարտավորեցնել նաև ընդունել համապատասխան որոշումներ,

2. Քննության առնել գնումների գործընթացում տնտեսական մրցակցության պաշտպանության օրենսդրության խախտումների վերաբերյալ բողոքում ներկայացված փաստերը և բողոքի քննության արդյունքներով ընդունված որոշման ուժի մեջ մտնելու օրը, պարտավորեցնել ընդունել համապատասխան որոշումներ, ներառյալ չկայացած հայտարարելու «ԿԵԱՊ-ԳՀԾՁԲ-ԱՆՎՏ-21/14» գնման ընթացակարգը:

Բողոքներ քննող անձին բողոքը մակագրվել է 22.02.2021թ.-ին:

Բողոքներ քննող անձի 23.02.2021թ.-ի թիվ /ԲՔԱ-ԼՕ/1/2611-2021 գրությամբ բողոքը վերադարձվել է՝ բողոքում առկա թերությունները վերացնելու համար:

Ընկերությունը 25.02.2021թ.-ին ներկայացրել է բողոքի շտկված տարբերակը, որը նույն օրը մակագրվել է Բողոքներ քննող անձին:

26.02.2021թ.-ին է [www.gnumner.am](http://www.gnumner.am) կայքում հրապարակված հայտարարությամբ բողոքը ընդունվել է վարույթ և տրվել է թիվ ԳԲՔԱ-ԼՕ-2021/10 համարի ծածկագիրը:

05.03.2021թ.-ին և 12.03.2021թ.-ին նշանակվել և հրավիրվել են նիստեր:

Գործի քննությունն ավարտվել է 05.03.2021թ.-ին և Բողոքներ քննող անձի որոշման հրապարակման օր է նշանակվել 12.03.2021թ.-ին:

## **2. «Տրանս-Սֆեր» ՍՊԸ-ի ներկայացրած փաստերը, հիմնավորումները և պահանջը.**

«Տրանս-Սֆեր» ՍՊԸ-ն 25.02.2021թ.-ին ներկայացրած բողոքով հայտնել է հետևյալը.

«09.02.2021թ.-ին «ԿԱՌԼԵՆ ԵՍԱՅԱՆԻ ԱՆԿԱՆ ՊՈԼԻԿԼԻՆԻԿԱ» ՓԲԸ-ի կողմից անվտանգության և պահնորդական ծառայությունների ձեռք բերման նպատակով հայտարարվել է ԿԵԱՊ-ԳՀԾՁԲ-ԱՆՎՏ-21/14 ծածկագրով գնանշման հարցում, որին մասնակցել են թվով 7 ընկերություններ: Մրցույթի մասնակիցների հայտերից բացի

<<Պահապան 1>> ՍՊԸ-ի կողմից հայտով առաջարկվում է չհիմնավորված ցածր գին 2.985.000 ՀՀ դրամ 12.02.2021թ.-ին ժամը 15:20-ին ՀՀ Գնումների մասին Օրենքի 15-րդ հոդվածի 6-րդ մասի հիման վրա հրավիրվել է բանակցություններ:

12.02.2021թ.-ին ժամը 15:20-ին ՀՀ Գնումների մասին Օրենքի 15-րդ հոդվածի 6-րդ մասի հիման վրա հրավիրվել է բանակցություններ: Մրցույթով հրավիրված բանակցություններում «Պահապան 1» ՍՊԸ-ի կողմից վերջնական գին առաջարկվում է 2.960.000 ՀՀ դրամ և հաջորդ տեղ զբաղեցնող «Քինգ Մարշալ» ՍՊԸ-ի կողմից 2.970.000 ՀՀ դրամ չհիմնավորված գներ:

Տվյալ կազմակերպությունների կողմից համաձայնեցված քայլերը բանակցություններում, դիտավորություն և միտում էր, իրականացրել են մրցակցության իմիտացիա, մասնակցող կազմակերպությունների մրցակցությունը սահմանափակելու կամ առկա է տվյալ կազմակերպության միջև հակամրցակցային համաձայնություն, որոնց գործողությունները համարվում են Գնումների մասին ՀՀ օրենքի 38-րդ հոդվածի 2-րդ մասի պահանջների խախտումներ:

Գնահատող հանձնաժողովի 12.02.2021թ.-ի թիվ 3 որոշմամբ հաստատվել են ընթացակարգի բոլոր մասնակիցների կողմից ներկայացված հայտերի՝ հրավերի պահանջներին համապատասխանության գնահատման արդյունքները: Համաձայն որի՝ Չափաբաժին 1՝ գնման առարկա է հանդիսանում՝ պահնորդական ծառայություններ, հաղթող է ճանաչվել «Պահապան 1» ՍՊԸ-ն՝ 10 ամիս ժամկետով, 2.960.000 ՀՀ դրամ առանց ԱԱՀ-ի, գնային առաջարկի հիման վրա, այսինքն 296.000 ՀՀ դրամ՝ առանց ԱԱՀ-ի, ամսական վճարով:

Հրավերի ՄԱՍ 1-ի 5-րդ մասի՝ ՀԱՅՏԻ ԳՆԱՅԻՆ ԱՌԱՋԱՐԿԸ, 5.1 կետով Ձեր կողմից հստակ սահմանված է հետևյալ, որ՝ առաջարկվող գինը ծառայության արժեքից բացի ներառում է փոխադրման, ապահովագրման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից: Առաջարկվող գնի հաշվարկը պետք է ներկայացվի հայտով:

ԿԵԱՊ-ԳՀԾՁԲ-ԱՆՎՏ-21/14 ծածկագրով մրցույթի Տեխնիկական բնութագրով սահմանված է, որ Պահնորդական ծառայության ընթացքում պետք է իրականացվի 24 ժամյա ֆիզիկական պահպանություն առնվազն մեկ պահնորդի միջոցով: Պահպանությունը իրականացնող պահնորդը պետք է ունենա պահնորդի որակավորում, տիրապետի իրեն վերապահված պարտականություններին .....:

Պահնորդական ծառայությունն իրականացվելու է մեկ պահակակետում շուրջօրյա, առնվազն մեկ պահնորդի միջոցով, առանց հանգստյան և փոնական օրերի, շաբաթական յոթ օր, քսանչորս ժամ՝ պահնորդները պետք է ունենան ՀՀ օրենքով սահմանված կարգով պահնորդի որակավորում: Այսինքն, միայն աշխատավարձի և վերջնահաշվարկի հաշվարկով՝

➤ գնային առաջարկի մեջ պետք է պահպանվեր պահնորդի ամսական նվազագույն աշխատավարձի հաշվարկը՝ 90000 կամ 92700 ՀՀ դրամը.

➤ ամսական մեկ պահակակետ-շաբաթական յոթ օր, քսանչորս ժամյա պահնորդական ծառայությունը նվազագույնը 3 պահնորդով, և պետք է կազմեր  $90000 \times 3 = 270,000$  ՀՀ դրամ կամ 278,100 ՀՀ դրամ

➤ 10 ամսվա դիմաց պետք է կազմեր 2,700.000 ՀՀ դրամ կամ 2,780.100 ՀՀ դրամ ավելացնելով նվազագույնը 270,000 ՀՀ դրամը, որպես վերջնահաշվարկի կամ արձակուրդային վճարների գումար, որը համարվում է այլ վճարումների գծով ծախսերը:

Հետևաբար, 10 ամսվա դիմաց «Պահապան 1» ՍՊԸ-ի կողմից առաջարկված գնային առաջարկը պակաս է ինքնարժեքից, քանի որ նվազագույնը 2,700.000 ՀՀ դրամին գումարելով 270,000 ՀՀ դրամը որպես վերջնահաշվարկի կամ արձակուրդային վճարների գումար, կազմում է 2,970.000 ՀՀ դրամ: Իսկ ուր մնացին հրավերի ՄԱՍ I-ի 5.1 կետի պահանջը առաջարկվող գնի մեջ ծառայության արժեքից բացի, պետք է ներառված լիներ փոխադրման, ապահովագրման, փուրքերի, հարկերի, այլ վճարումների գծով ծախսերը և ակնկալվող շահույթը:

Հաշվարկը ապացուցում է, որ փվյալ կազմակերպությունների կողմից առաջարկված գներով նույնիսկ չեն կարողանալու ապահովել ՀՀ Օրենսդրությամբ սահմանված նվազագույն աշխատավարձը, ինչպես նաև աշխատակցի հասանելիք վերջնահաշվարկը կամ արձակուրդային վճարը այլ վճարումների գծով ծախսերը, ըստ որի նման վարքագիծը ենթադրում է, որ այդ կազմակերպությունները թաքցնելու են հարկերը չեն գրանցելու աշխատակիցներին, ինչը գնման գործընթացի շրջանակներում հակաօրինական արարք կատարելու գործողություն է:

Արդյունքում, ինչպես նաև, պահնորդական ծառայությունների ձեռք բերման մրցույթներում նշված կազմակերպությունների կողմից մրցակիցներին դուրս մղելու նպատակով, դեմպինգ իրականացնելով խաթարում են բնականոն մրցակցությանը, ինչը նաև միտում է ոլորտում մենաշնորհի ձեռք բերելուն:

Պատվիրատուին գրավոր ներկայացվել է, որ «Պահապան 1» ՍՊԸ-ի հետ չպետք է կնքվի պայմանագիր և կատարվածի վերաբերյալ փոխադրված կազմակերպության ղեկավար մարմնի կամ ներկայացուցչի կողմից գնման գործընթացի շրջանակներում հակասօրինական արարք կատարելու համար, Գնումների մասին ՀՀ օրենքի 12-րդ հոդվածի պահանջով, գրավոր փեղեկացնել իրավապահ մարմիններին:

ԿԵԱՊ-ԳՀԾՁԲ-ԱՆՎՏ-21/14 ծածկագրով մրցույթի հրավերի ՄԱՍ 1-ի 5.1 կետի պահանջը առաջարկվող գնի մեջ ծառայության արժեքից բացի, պետք է ներառված լիներ փոխադրման, ապահովագրման, տուրքերի, հարկերի, այլ վճարումների գծով ծախսերը և ակնկալվող շահույթը: Գնումների մասին ՀՀ օրենքի 39-րդ հոդվածի 1-ին մասով հստակ սահմանված է Պայմանագրի գնի հաշվարկը:

Պայմանագրի գնի հաշվարկը պետք է ներառի փոխադրման պայմանագրի կատարումն ապահովելու նպատակով կատարվելիք բոլոր վճարները (ծախսերը), այդ թվում՝ հարկերի, տուրքերի, փոխադրման, ապահովագրման ծախսերը, պարգևավճարները և ակնկալվող շահույթը:

Ուստի, պահանջարկային ծառայությունը պետք է իրականացվի համաձայն Տեխնիկական բնութագրի պահանջի և պայմանագրի գնի հաշվարկի մեջ պետք է ներառված լինեն բոլոր ծախսերը ինչպես նաև ակնկալվող շահույթը, այն է - Պահանջարկային ծառայության ընթացքում պետք է իրականացվի 24 ժամյա ֆիզիկական պահպանություն առնվազն մեկ պահնորդի միջոցով: Պահպանությունը իրականացնող պահնորդը պետք է ունենա պահնորդի որակավորում, փիրապետի իրեն վերապահված պարտականություններին...:

Պահանջարկային ծառայությունն իրականացվելու է մեկ պահակակետում շուրջօրյա, առնվազն մեկ պահնորդի միջոցով, առանց հանգստյան և տոնական օրերի, շաբաթական յոթ օր, քսանչորս ժամ՝ պահնորդները պետք է ունենան ՀՀ օրենքով սահմանված կարգով պահնորդի որակավորում:

Վերոնշյալ բոլոր պայմանները պարտադիր են և պետք է իրականացվեն պահանջարկային ծառայությունը մատուցողի կողմից:

Այդ նույն պահանջները՝ Պահանջարկային ծառայությունները, կարգավորվում են «Մասնավոր պահանջարկային գործունեության մասին» ՀՀ Օրենքով և օրենքի 5-րդ հոդվածով սահմանված է Թիկնապահական և պահնորդական գործունեության սկզբունքները՝ թիկնապահական և պահնորդական գործունեությունն իրականացվում է

օրինականության, օրենքի առջև բոլորի հավասարության, մարդու և քաղաքացու իրավունքները, ազատություններն ու արժանապատվությունը, ֆիզիկական և իրավաբանական անձանց իրավունքները և օրինական շահերը հարգելու, պաշտպանվող ֆիզիկական անձի ու պահպանվող օբյեկտի պաշտպանությունը հուսալի և անվրանգ եղանակով իրականացնելու սկզբունքների հիման վրա:

Նույն օրենքի 12-րդ հոդվածով սահմանված է Թիկնապահի և պահնորդի իրավական կարգավիճակը.

Թիկնապահը և պահնորդն աշխատում են աշխատանքային պայմանագրի հիման վրա, և նրանց վրա տարածվում են աշխատանքային օրենսդրության պահանջները:

Թիկնապահի և պահնորդի աշխատանքին հավակնող անձը աշխատանքային պայմանագիր կնքելիս աշխատանքային օրենսդրությամբ նախատեսված փաստաթղթերի հետ մեկտեղ պարտավոր է ներկայացնել իր կողմից հատուկ պատրաստություն (որակավորում) անցնելը հավաստող փաստաթուղթ:

Թիկնապահի և պահնորդի կարգավիճակ ձեռքբերելու և թիկնապահական և պահնորդական գործառույթներ իրականացնելու (այդ թվում՝ զենքի օգտագործմամբ և հատուկ միջոցների գործադրմամբ) իրավունք ունեն Հայաստանի Հանրապետության այն քաղաքացիները, ովքեր ունեն թիկնապահի կամ պահնորդի որակավորում:

Թիկնապահի և պահնորդի կարգավիճակ ձեռք բերելու և թիկնապահական և պահնորդական գործառույթ իրականացնելու իրավունք չունեն այն անձինք, ովքեր՝

- դատական կարգով ճանաչվել են անգործունակ կամ սահմանափակ գործունակ.
- հոգեկան հիվանդության, հարբեցողության կամ թմրամոլության պատճառով հաշվառման են կանգնած բուժհիմնարկներում
- դատապարտվել են դիտավորյալ հանցագործության համար, և դատվածությունը սահմանված կարգով մարված կամ հանված չէ.
- խուսափել են ժամկետային պարտադիր զինվորական ծառայությունից:

Նույն օրենքի 14-րդ հոդվածով սահմանված է՝ Պահնորդի (թիկնապահի) համազգեստը, վկայականը, զենքը, հատուկ և տեխնիկական միջոցները.

Պահնորդական կազմակերպությունը պարտավոր է պահնորդին (թիկնապահին) տրամադրել հատուկ համազգեստ, անձը հաստատող վկայական, զենք, հատուկ և տեխնիկական միջոցներ:

Հատուկ համազգեստը տեսանելի կերպով պարունակեալ է կամ նրան փակցվելու է պահնորդի (թիկնապահի) անունը, ազգանունը և պահնորդական կազմակերպության ապրանքային նշանը, ֆիրմային անվանումը:

Պահնորդն իրավունք չունի համազգեստ կրելու՝ չլինելով պարտականությունների կատարման մեջ, բացառությամբ մասնավոր պահնորդական կազմակերպության շենքում կամ դրա հարակից տարածքում գտնվելու դեպքերի: Իր պարտականությունները կատարելիս պահնորդը պարտավոր է կրել համազգեստ: Այս պարտականությունից ազատվում են միայն թիկնապահները սույն օրենքի 6-րդ հոդվածի 1-ին կետով նախատեսված ծառայության մատուցումն ապահովող պարտականությունները կատարելիս:

Իրենց պարտականությունները կատարելիս պահնորդները (թիկնապահները) կարող են օգտագործել միայն պահնորդական կազմակերպության սեփականությունը համարվող կամ օրինական տիրապետման տակ գտնվող զենքը, հատուկ և տեխնիկական միջոցները: Տրանսպորտային միջոցի վրա տեսանելի կերպով պետք է պատկերված լինեն կազմակերպության անվանումը, ապրանքային նշանը, կազմակերպության հեռախոսահամարները:

Կատարողը, Անվտանգության և պահնորդական ծառայությունների պայմանագրի շրջանակներում պարտավոր է պահնորդին տրամադրել հատուկ համազգեստ, անձը հաստատող վկայական նշված պահնորդի անունը, տեխնիկական միջոցները և համազգեստը, ինչի վրա տեսանելի կերպով պետք է պարունակի պահնորդական կազմակերպության ապրանքային նշանը, ֆիրմային անվանումը, որոնք համարվում են անհրաժեշտ ծախսեր: Այսինքն յուրաքանչյուր պահնորդին, կատարողը պարտավոր է տրամադրել հատուկ համազգեստ տրամադրվող եղանակների համար՝ գարուն/աշուն, ամառ, ծմեռ, կազմակերպության ապրանքային նշանը՝ շեվրո, լինելով փակցված, որի շուկայական գինը մեկ պահնորդի համար կազմում է 35000-40000 ՀՀ դրամ, չհաշված պահպանվող օբյեկտներում անցագրային և ներօբյեկտային պայմանագրերի ապահովման համար գրանցամատյանները, գրենական պիտույքները և կապի միջոցների այլ ծախսերը:

Ուստի նման պահանջները պարտադիր են Պատվիրատուի տարածքներում Անվտանգության և պահնորդական ծառայությունների մատուցման ժամանակ:

Բողոքի փաստական և իրավական հիմնավորումները.

Գնումների մասին ՀՀ օրենքի 3-րդ հոդվածի 2-րդ մասի համաձայն գնումների գործընթացը հիմնվում է հետնյալ սկզբունքների վրա.

գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում:

պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում:

ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:

Գնումների մասին ՀՀ օրենքի 13-րդ հոդվածի՝ Գնման առարկայի բնութագրերը՝

Գնման առարկայի բնութագրերը պետք է ամբողջությամբ և հստակ նկարագրեն ձեռք բերվող ապրանքի, աշխատանքի կամ ծառայության հատկանիշները, դրանց ձեռքբերման և վճարման պայմանները՝ բացառելով փարակերպ մեկնաբանությունը: Գնման առարկայի բնութագրերը, որոնք ներառում են նաև պայմանագրի գինը, ընդգրկվում են պայմանագրում:

Գնման առարկայի բնութագրերը՝

պետք է մրցակցության հավասար պայմաններ ապահովեն հնարավոր մասնակիցների համար:

չպետք է հանգեցնեն գնումների գործընթացում մրցակցության համար չհիմնավորված խոչընդոտների առաջացմանը:

պետք է լինեն օբյեկտիվորեն հիմնավորված և համարժեք լինեն այն կարիքին, որի բավարարման նպատակով կատարվում է տվյալ գնումը:

ներառում են գնման առարկայի մասնագրի, տեխնիկական տվյալների, իսկ աշխատանքների դեպքում՝ նաև աշխատանքների ծավալաթերթի, ժամանակացույցի և այլ ոչ գնային պայմանների ամբողջական և համարժեք նկարագրությունը:

Ելնելով գնման առարկայի առանձնահատկությունից դրանց հատկանիշները հնարավորինս ներառում են ձեռք բերվող ապրանքի, աշխատանքի կամ ծառայության որակին, ստանդարտին, անվտանգությանը, պայմանական նշաններին, տեղամիևաբանությանը, փաթեթավորմանը, բեռնաթափմանը, չափին, նախագծերին, ինչպես նաև գնման առարկայի այլ հատկանիշներին վերաբերող պայմանների հստակ նկարագրությունը՝ հիմնված միջազգային ստանդարտների և Հայաստանի Հանրապետությունում գործող նորմատիվատեխնիկական փաստաթղթերի,



ստանդարտների, իսկ դրանց բացակայության դեպքում՝ ժամանակավոր տեխնիկական պայմանների վրա:

Գնման առարկայի հատկանիշները կարող են սահմանվել նաև որպես կատարողականի կամ գործառույթային (ֆունկցիոնալ) նկարագրեր, որոնք պետք է ներկայացվեն բավարար ճշտությամբ՝ հնարավորություն տալով մասնակիցներին և պատվիրատուին ճշգրիտ ընկալել պայմանագրի առարկան:

Գնման առարկայի հատկանիշները չպետք է պահանջ կամ հղում պարունակեն որևէ առևտրային նշանի, ֆիրմային անվանմանը, արտոնագրին, էսքիզին կամ մոդելին, ծագման երկրին կամ կոնկրետ աղբյուրին կամ արտադրողին, բացառությամբ այն դեպքերի, երբ անհնար է գնման առարկայի բնութագրումն առանց դրանց: Հղումներ օգտագործելու դեպքում հատկանիշների բնութագիրը պետք է պարունակի «կամ համարժեք» բառերը:

Գնումների մասին ՀՀ օրենքի 28-րդ հոդվածի 1-ին մասի 10-րդ ենթակետի համաձայն՝ հրավերը պետք է պարունակի նշում այն մասին, որ առաջարկվող գինը, ապրանքների, աշխատանքների և ծառայությունների արժեքից բացի, ներառում է փոխադրման, ապահովարման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից: Առաջարկվող գնի հաշվարկը պետք է ներկայացվի հայտով:

Գնումների մասին ՀՀ օրենքի 38-րդ հոդվածի համաձայն՝ Մասնակիցների հետ բանակցություններ վարելու անթույլատրելիությունը, տնտեսական մրցակցության սահմանափակման դեպքերը բացահայտելը և կանխարգելելը:

Գնումների գործընթացում տնտեսական մրցակցության պաշտպանության օրենսդրության խախտումների, այդ թվում՝ հակամրցակցային համաձայնությունների և գերիշխող դիրքի չարաշահումների բացահայտման նպատակով իրավասու մարմինը համագործակցում է լիազոր մարմնի և պատվիրատուների հետ:

Գնումների մասին ՀՀ օրենքի 39-րդ հոդվածի Պայմանագրի գնի հաշվարկը՝

պայմանագրի գնի հաշվարկը պետք է ներառի տվյալ գնման պայմանագրի կատարումն ապահովելու նպատակով կատարվելիք բոլոր վճարները (ծախսերը), այդ թվում՝ հարկերի, տուրքերի, փոխադրման, ապահովագրման ծախսերը, պարգևավճարները և ակնկալվող շահույթը:

Պայմանագրի գինը՝

- կարող է լինել գործոնային, երբ պայմանագրի գինը փոփոխվում է պայմանագրով նախատեսված պայմանների (գործոնների) փոփոխության ազդեցությամբ: Հակառակ դեպքում պայմանագրի գինը կայուն է, և կողմերը պարտավոր են պայմանագրային պարտավորությունները ողջ ծավալով կատարել պայմանագրի գնի շրջանակում:

- պետական գաղտնիք պարունակող՝ ռազմական կարիքների բավարարման նպատակով արտադրանքի նոր տեսակների հեռանկարային մշակման, գիտահետազոտական և փորձակոնստրուկտորական աշխատանքների ձեռքբերման դեպքում կարող է լինել փաստացի ծախսերով հաշվարկված, պայմանավ, որ այն չպետք է գերազանցի տվյալ ապրանքը, աշխատանքը կամ ծառայությունը ձեռք բերելու համար նախատեսված ֆինանսական հատկացման չափը:

Գնումների մասին ՀՀ օրենքի 51-րդ հոդվածի Գնումների ընթացակարգի կասեցումը.

- Գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ սույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքի քննության արդյունքներով ընդունված որոշման ուժի մեջ մտնելու օրը:

- Գնումների հետ կապված բողոքներ քննող անձի որոշմամբ կասեցումը կարող է հանվել, եթե պատվիրատուի ներկայացրած հիմնավորումների համաձայն, հանրային կամ պաշտպանության և ազգային անվտանգության շահերից ելնելով, անհրաժեշտ է շարունակել գնման գործընթացը: Սույն մասով նախատեսված որոշումը գնումների հետ կապված բողոքներ քննող անձը հրապարակում է տեղեկագրում՝ այն կայացնելու օրվան հաջորդող աշխատանքային օրը:

ՀՀ քաղաքացիական օրենսգրքի 305-րդ հոդվածի համաձայն՝ օրենքի կամ այլ իրավական ակտերի պահանջներին չհամապատասխանող գործարքն անվավեր է, եթե օրենքը չի սահմանում, որ նման գործարքն առոչինչ է կամ չի նախատեսում խախտման այլ հետևանքներ:

Հաշվի առնելով այն հանգամանքը, որ Գնման առարկայի հատկանիշները բավարար ճշտությամբ սահմանված չեն որպես կատարողականի կամ գործառության (ֆունկցիոնալ) նկարագրեր, հնարավորություն չի տալիս մասնակիցներին և պատվիրատուին ճշգրիտ ընկալել պայմանագրի առարկան: Ուստի նաև նման խախտմամբ կնքվելիք պայմանագրից զերծ մնալը Մասնակցին տրված իրավունքն է:»:

Վերոգրյալով պայմանավորված՝ «Տրանս-Սֆեր» ՍՊԸ-ն Բողոքներ քննող անձին խնդրել է՝

1. Կասեցնել «ԿԵԱՊ-ԳՀԾՁԲ-ԱՆՎՏ-21/14» գնման ընթացակարգը և պատվիրատուին արգելել կատարել որոշակի գործողություններ, պարտավորեցնել նաև ընդունել համապատասխան որոշումներ,

2. Քննության առնել գնումների գործընթացում տնտեսական մրցակցության պաշտպանության օրենսդրության խախտումների վերաբերյալ բողոքում ներկայացված փաստերը և բողոքի քննության արդյունքներով ընդունված որոշման ուժի մեջ մտնելու օրը, պարտավորեցնել ընդունել համապատասխան որոշումներ, ներառյալ չկայացած հայտարարելու «ԿԵԱՊ-ԳՀԾՁԲ-ԱՆՎՏ-21/14» գնման ընթացակարգը:

Ընկերությունը 05.03.2021թ.-ին ներկայացրած լրացմամբ հայտնել է հետևյալը.

*«Ձեզ է ներկայացվում «Կարեն Եսայանի անվան պոլիկլինիկա» ՓԲԸ-ի կողմից ներկայացված Դիրքորոշման վերաբերյալ պատասխանը, այն է.*

1. Պատվիրատուին հայտնի է եղել մրցույթի մասնակից «Պահապան 1» ՍՊ և «Քինգ Մարշալ» ՍՊ ընկերությունների կողմից կամ նրանց ղեկավար մարմինների կամ ներկայացուցիչների կողմից գնման գործընթացի շրջանակներում հակաօրինական արարքները մրցակցության իմիտացիա իրականացնելը և ինքնարժեքից ցածր գին առաջարկելը, սակայն դրա ի հայտ գալու օրը, չեն պահանջել Գնումների մասին ՀՀ օրենքի 39-րդ հոդվածով Պայմանագրի գնի հաշվարկը, սահմանված տվյալ գնման պայմանագրի կատարումն ապահովելու նպատակով կատարվելիք բոլոր վճարների (ծախսերի), այդ թվում՝ հարկերի, տուրքերի, փոխադրման, ապահովագրման ծախսերի, պարգևավճարների, վերջնահաշվարկների և ակնկալվող շահույթի հաշվարկը, ինչպես նաև չեն պահանջել պայմանագրի գնի սահմաններում տեխնիկական բնութագրով պահանջված նորմերը կամ դրույթները պահպանելու հնարավորությունը, այսինքն օբյեկտիվորեն հիմնավորված և համարժեք պեղք է լինեին այն կարիքին, որի բավարարման նպատակով կատարվում է տվյալ գնումը, ինչը ԳՆԱՆՇՄԱՆ ՀԱՐՑՄԱՆ ՀՐԱՎԵՐ-ի ՄԱՍ 1-ի 5-րդ մասի՝ ՀԱՅՏԻ ԳՆԱՅԻՆ ԱՌԱՋԱՐԿԸ, 5.1 կետով հստակ սահմանված է՝

5.1 Առաջարկվող գինը ծառայության արժեքից բացի ներառում է փոխադրման, ապահովագրման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից: Առաջարկվող գնի հաշվարկը պեղք է ներկայացվի հայտով:

2. Տվյալ ընկերությունները մրցակցությունը սահմանափակելու գործողությունների միջոցով, խաթարելով բնականոն մրցակցությանը իրականացրել են դեմպինգ, առաջարկել են չհիմնավորված ապօրինի մենաշնորհային իջեցված գներ՝ որն ուղղված է այլ տնտեսավարող սուբյեկտների շուկա մուտք գործելուն խոչընդոտելուն, տնտեսավարող այլ սուբյեկտներին շուկայից դուրս մղելուն, խտրական գներ սահմանելուն կամ պահպանելուն, ուստի և Պատվիրատուն Գնումների մասին ՀՀ Օրենքի 12-րդ հոդվածի պահանջով, կատարվածի հակաօրինական գործողությունների, վերաբերյալ գրավոր չի տեղեկացրել իրավապահ մարմիններին:

3. Կատարվածից ելնելով Պատվիրատուին 19.02.2021թ.ի գրությամբ ներկայացվել է հակաօրինական գործողությունների և տնտեսական մրցակցության պաշտպանության օրենսդրության խախտումների փաստերը, որ

««ԿԱՌԼԵՆ ԵՍԱՅԱՆԻ ԱՆՎԱՆ ՊՈԼԻԿԼԻՆԻԿԱ» ՓԲԸ-ի ԿԱՐԻՔՆԵՐԻ ՀԱՄԱՐ ՊԱՀՆՈՐԴԱԿԱՆ ԾԱՌԱՅՈՒԹՅՈՒՆՆԵՐԻ ՁԵՌՔԲԵՐՄԱՆ ՆՊԱՏԱԿՈՎ ՀԱՅՏԱՐԱՐՎԱԾ ԳՆԱՆՇՄԱՆ ՀԱՐՑՄԱՆ ՀՐԱՎԵՐ-ի ՄԱՍ Ի-ի 5-րդ մասի՝ ՀԱՅՏԻ ԳՆԱՅԻՆ ԱՌԱՋԱՐԿԸ, 5.1 կետով Ձեր կողմից հստակ սահմանված է՝

5.1 Առաջարկվող գինը ծառայության արժեքից բացի ներառում է փոխադրման, ապահովագրման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից: Առաջարկվող գնի հաշվարկը պետք է ներկայացվի հայտով:

Կից գրությամբ հիմնավորվում է, որ Համաձայն՝ Չափաբաժին 1 Գնման առարկա է հանդիսանում՝ պահնորդական ծառայություններ, հաղթող է ճանաչվել «Պահապան 1»ՍՊԸ-ն 10 ամիս ժամկետով, 2,960.000 ՀՀ դրամ առանց ԱԱՀ-ի, և գնային առաջարկը պակաս է ինքնարժեքից, որի համար հանձնաժողովը պետք էր միջոցներ ձեռնարկել, սակայն չի կատարվել:

Ուստի խնդրում եմ սեղմ ժամկետում պատասխանել կից գրությանը:»

Պատվիրատուն տվյալ գրությանը պատասխանվել է, որ «Հարգելի գործընկեր Համաձայն հրավերի 2-րդ բաժնի 2-կետի 4-րդ ենթակետի պահանջվում է գնային առաջարկը ներկայացնել հետևյալ ձևով.

2.4 գնային առաջարկ՝ համաձայն հավելված N 2-ի:

Գնային առաջարկը ներկայացվում է արժեք (ինքնարժեքի և կանխատեսվող շահույթի հանրագումարը) և ավելացված արժեքի հարկ ընդհանրական բաղադրիչներից

բաղկացած հաշվարկի ձևով: Արժեքի բաղադրիչների հաշվարկ՝ բացվածք կամ այլ մանրամասներ չեն պահանջվում և ներկայացվում:»

Ըստ պատասխանից ապացուցվում է, որ Պատվիրատուն հրավերով սահմանված կարգի համաձայն 7.2-րդ կետի Հայտերը գնահատվում են սույն հրավերով սահմանված կարգով, ընտրված և հաջորդաբար տեղեր զբաղեցրած մասնակիցներին որոշելիս գնային առաջարկների գնահատում չի իրականացրել, ուստի և համեմատում չի իրականացրել առանց հրավերի 1-ին մասի 5.2-րդ կետում նշված հարկի գումարի հաշվարկման, գնային առաջարկի ինքնարժեքից ցածր լինելու հանգամանքը՝

7.3 Ընտրված մասնակիցը որոշվում է՝ բավարար գնահատված հայտեր ներկայացրած մասնակիցների թվից՝ նվազագույն գնային առաջարկ ներկայացրած մասնակցին նախապատվություն տալու սկզբունքով: Ընդ որում, հանձնաժողովի կողմից ընտրված և հաջորդաբար տեղեր զբաղեցրած մասնակիցներին որոշելիս գնային առաջարկների գնահատումը և համեմատումն իրականացվում է առանց սույն հրավերի 1-ին մասի 5.2-րդ կետում նշված հարկի գումարի հաշվարկման:

Հաշվի չի առնվել նաև այն, որ հրավերի 2-րդ բաժնի 2-րդ կետի 4-րդ ենթակետը վերաբերվում է հայտերը ներկայացնելուն, այլ ոչ թե 5.1 կետով սահմանված պահանջը տվյալ գնման պայմանագրի կատարումն ապահովելու նպատակով, Պայմանագրի կնքման համար առաջարկված գինը, որը չի կարող պակաս լինել դրանց ինքնարժեքից:

Պատվիրատուն պարտավոր էր ՀՀ Օրենսդրության խախտումների համար միջոցներ ձեռնարկել և պահանջել անբարեխիղճ մրցակցության, մրցակցությունը սահմանափակելու գործողությունների միջոցով գնման գործընթացներում չհիմնավորված ապօրինի մենաշնորհային իջեցված, ցածր գին առաջարկելու համար՝ տվյալ գնման պայմանագրի կատարումն ապահովելու նպատակով կատարվելիք բոլոր վճարների (ծախսերի), այդ թվում՝ հարկերի, տուրքերի վերջնահաշվարկների և ակնկալվող շահույթի հաշվարկը:

Վերջնական գնային առաջարկը ինքնարժեքից ցածր ներկայացնելու համար հայտը չի մերժել, ուստի և տվյալ ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու կամ հակաօրինական արարքի դրա ի հայտ գալու օրը, համար իրավապահ մարմիններին այդ մասին գրավոր տեղեկացնելու ոչ մի միջոց չի ձեռնարկվել:

Հիմք՝ Գնումների մասին ՀՀ Օրենքի 12-րդ հոդվածի Մասնակիցների հակաօրինական գործողությունների հետևանքները.

1. Եթե հայտնաբերվում է մասնակցի կամ նրա ղեկավար մարմնի ներկայացուցչի գնման գործընթացի շրջանակներում հակաօրինական արարք, ապա դրա ի հայտ գալու օրը պատվիրատուն այդ մասին գրավոր տեղեկացնում է իրավապահ մարմիններին:

2. Գնումների մասին ՀՀ Օրենքի 13-րդ հոդվածի Գնման առարկայի բնութագրերը

2. Գնման առարկայի բնութագրերը՝

1) պետք է մրցակցության հավասար պայմաններ ապահովեն հնարավոր մասնակիցների համար.

2) չպետք է հանգեցնեն գնումների գործընթացում մրցակցության համար չհիմնավորված խոչընդոտների առաջացմանը.

3) պետք է լինեն օբյեկտիվորեն հիմնավորված և համարժեք լինեն այն կարիքին, որի բավարարման նպատակով կատարվում է տվյալ գնումը.

3. Գնումների մասին ՀՀ Օրենքի 28-րդ հոդվածի 1-ին մասի 10-րդ ենթակետի համաձայն՝ հրավերը պետք է պարունակի նշում այն մասին՝ որ առաջարկվող գինը, ապրանքների, աշխատանքների և ծառայությունների արժեքից բացի, ներառում է Փոխադրման, ապահովագրման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից: Առաջարկվող գնի հաշվարկը պետք է ներկայացվի հայտով:

4. Գնումների մասին ՀՀ Օրենքի 38-րդ հոդվածի՝ Մասնակիցների հետ բանակցություններ վարելու անթույլատրելիությունը, տնտեսական մրցակցության սահմանափակման դեպքերը բացահայտելը և կանխարգելելը՝. Գնումների գործընթացում տնտեսական մրցակցության պաշտպանության օրենսդրության խախտումների, այդ թվում՝ հակամրցակցային համաձայնությունների և գերիշխող դիրքի չարաշահումների բացահայտման նպատակով իրավասու մարմինը համագործակցում է լիազոր մարմնի և պատվիրատուների հետ:

5. Գնումների մասին ՀՀ Օրենքի 39-րդ հոդվածի Պայմանագրի գնի հաշվարկը՝

1. Պայմանագրի գնի հաշվարկը պետք է ներառի տվյալ գնման պայմանագրի կատարումն ապահովելու նպատակով կատարվելիք բոլոր վճարները (ծախսերը), այդ թվում՝ հարկերի, տուրքերի, փոխադրման, ապահովագրման ծախսերը, պարգևավճարները և ակնկալվող շահույթը:

Գնումների մասին ՀՀ Օրենքի 28-րդ հոդվածի 1-ին մասի 10-րդ կետով հստակ սահմանված է՝ Հրավերի բովանդակությունը

10) նշում այն մասին, որ առաջարկվող գինը, ապրանքների, աշխատանքների և ծառայությունների արժեքից բացի, ներառում է փոխաբրման, ապահովագրման, փուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից: Առաջարկվող գնի հաշվարկը պետք է ներկայացվի հայտով.

բ) Հայաստանի Հանրապետության կառավարության 2017 թվականի մայիսի 4-ի N 526-Ն որոշման Գնումների գործընթացի կազմակերպման կարգը, 40-րդ կետի գ) ենթակետով սահմանվել է, որ բանակցությունների համար սահմանված վերջնաժամկետը լրանալու պահին, եթե դրան ներկա մասնակիցների ներկայացրած գները գերազանցում են գնման հայտով սահմանված գինը, ապա գնահատող հանձնաժողովը կարող է բանակցությունների արդյունքում ցածր գնային առաջարկ ներկայացրած մասնակցին հայտարարել ընտրված մասնակից, սակայն ինքնարժեքից ցածր գին ներկայացնելու արդյունքում ընտրված մասնակիցը չի կարող ճանաչվել հաղթող և վերջինիս հետ կնքել պայմանագիր:

Հաշվի առնելով այն փաստը, որ ՀՀ կառավարության 2017 թվականի մայիսի 4-ի N 526-Ն որոշմամբ ենթաօրենսդրական նորմատիվ իրավական ակտ է, ուստի այն չի կարող հակասել ավելի բարձր իրավաբանական ուժ ունեցող նորմատիվ իրավական ակտին, փվյալ դեպքում Գնումների մասին ՀՀ Օրենքին, ուստի և Պատվիրատուն պարտավոր էր ղեկավարվել բացառապես ՀՀ Օրենսդրության, Գնումների մասին ՀՀ Օրենքով և կիրառել այն, որը չի իրականացրել:»:

**3. «Կառլեն Եսայանի անվան պոլիկլինիկա» ՓԲԸ-ի կողմից բողոքի վերաբերյալ ներկայացված փաստարկները, հիմնավորումները և դիրքորոշումը.**

Բողոքներ քննող անձը 26.02.2021թ.-ին թիվ /ԲՔԱ-ԼՕ/2/2814-2021 գրությամբ դիմել է «Կառլեն Եսայանի անվան պոլիկլինիկա» ՓԲԸ-ին (այսուհետ նաև՝ Պատվիրատու), հնարավորություն տալով «Տրանս-Սֆեր» ՍՊԸ-ի կողմից 25.02.2021թ.-ին ներկայացված բողոքի վերաբերյալ ներկայացնել անհրաժեշտ բոլոր փաստաթղթերի պատճեններն ու Պատվիրատուի գրավոր կարծիքը:

Պատվիրատուն ստանալով գրավոր դիրքորոշում հայտնելու վերաբերյալ գրությունը, ինչպես նաև ծանուցված լինելով նիստերի տեղի, օրվա և ժամի մասին, չի ներկայացել հրավիրված նիստերին:

04.03.2021թ.-ի թիվ 118 գրությամբ ներկայացված դիրքորոշմամբ հայտնել է հետևյալը.

««Կառլեն Եսայանի անվան պոլիկլինիկա» ՓԲԸ-ի կողմից 02.02.2021 թ.-ին հայտարարված ԿԵԱՊ-ԳՀԾՁԲ-ԱՆՎՏ-21/14 գնման ընթացակարգը կազմակերպվել է ՀՀ Գնումների մասին Օրենքով սահմանված կարգով:

Համաձայն հրավերի 2-րդ բաժնի 2-կետի 4-րդ ենթակետի պահանջվում է գնային առաջարկը ներկայացնել հետևյալ ձևով.

2.4 գնային առաջարկ՝ համաձայն հավելված N 2-ի:

Գնային առաջարկը ներկայացվում է արժեք (ինքնարժեքի և կանխատեսվող շահույթի հանրագումարը) և ավելացված արժեքի հարկ ընդհանրական բաղադրիչներից բաղկացած հաշվարկի ձևով: Արժեքի բաղադրիչների հաշվարկ՝ բացվածք կամ այլ մանրամասներ չեն պահանջվում և ներկայացվում:»:

#### **4. ԳԲՔԱ-ԼՕ-2021/10 բողոքի քննության համար էական նշանակություն ունեցող փաստերը.**

Սույն գործի քննության համար էական նշանակություն ունեցող փաստերի համաձայն՝

i. «Կառլեն Եսայանի անվան պոլիկլինիկա» ՓԲԸ-ի կողմից պահնորդական ծառայությունների ձեռքբերման նպատակով 02.02.2021թ.-ին հայտարարվել է «ԿԵԱՊ-ԳՀԾՁԲ-ԱՆՎՏ-21/14» ծածկագրով գնանշման հարցման ընթացակարգ (այսուհետ նաև՝ Ընթացակարգ):

ii. Հայտերի բացման նիստի օր է սահմանվել 09.02.2020թ.-ին:

iii. Ընթացակարգը կազմակերպվել է «Գնումների մասին» ՀՀ օրենքի 15-րդ հոդվածի 6-րդ մասի ենթակետի պահանջներին համապատասխան:

Ընթացակարգի հրավերի (այսուհետ նաև՝ Հրավեր) տեխնիկական բնութագիր-գնման ժամանակացույցով պահնորդական ծառայությունների համար սահմանվել է հետևյալ տեխնիկական բնութագիրը. Պահնորդական ծառայության ընթացքում պետք է



իրականացվի 24 ժամյա ֆիզիկական պահպանություն առնվազն մեկ պահնորդի միջոցով: Պահպանությունը իրականացնող պահնորդը պետք է ունենա պահնորդի որակավորում, տիրապետի իրեն վերապահված պարտականություններին: Պահնորդական ծառայությունն իրականացվելու է մեկ պահակակետում շուրջօրյա, առնվազն մեկ պահնորդի միջոցով, առանց հանգստյան և տոնական օրերի, շաբաթական յոթ օր, քսանչորս ժամ: Պահնորդները պետք է ունենան ՀՀ օրենքով սահմանված կարգով պահնորդի որակավորում: Այսինքն, միայն աշխատավարձի և վերջնահաշվարկի հաշվարկով:

iv. Ընթացակարգին մասնակցելու նպատակով, հայտ են ներկայացրել «Աբսոլյուտ Սեքյուրիթի» ՍՊ, «Լիոն Սեքյուրիթի Սերվիս» ՍՊ, «Քինգ Մարշալ» ՍՊ, «Պահապան 1» ՍՊ ընկերությունները:

v. Մասնակիցներն առաջարկել են հետևյալ գները.

Զ/Ը	մասնակցի անվանումը	Մասնակցի գնային առաջարկը			Նախահաշվային գին
		Արժեք	ԱԱՀ	Ընդամենը	
<i>Չափաբաժին 1՝ Պահնորդական ծառայություններ</i>					
1	«Քինգ Մարշալ»ՍՊԸ	4800000	960000	5760000	3 583 000
2	«Պահապան 1»ՍՊԸ	2985000	597000	3582000	
3	«ԱԼԱՖԱ ՖՈՐՍ» պահնորդական և թիկնապահական ծառայություն ՍՊԸ	3990000	0	3990000	
4	«ՏՐԱՆՍ-ՍՖԵՐ»ՍՊԸ	3700000	0	3700000	
5	«Լիոն Սեքյուրիթի Սերվիս»ՍՊԸ	3815000	763000	4578000	
6	«Աբսոլյուտ Սեքյուրիթի» ՍՊԸ	4000000	0	4000000	
7	«Պրոֆ Սերվիս Սեքյուրիթի» ՍՊԸ	3800000	0	3800000	

vi. Ընթացակարգի գնահատող հանձնաժողովի (այսուհետ նաև՝ Հանձնաժողով) 09.02.2021թ.-ի նիստի թիվ 2 արձանագրության համաձայն՝ Հանձնաժողովը, հիմք ընդունելով ՀՀ կառավարության 4 մայիսի 2017 թվականի թիվ 526-Ն որոշման 40-րդ կետի 5-րդ ենթակետը, որոշել է հայտերի բացման և գնահատման նիստը կասեցնել և մասնակիցներին հրավիրել գների նվազեցման շուրջ բանակցությունների՝ 12.02.2021թ.-ին, ժամը 15:20-ին:

vii. Հանձնաժողովի 12.02.2021թ.-ի նիստի թիվ 3 արձանագրության համաձայն՝ բանակցությունների մասնակիցներն առաջարկել են հետևյալ գները.

Չ/Հ	մասնակցի անվանումը	Մասնակցի գնային առաջարկը			Նախահաշվարկին գին
		Արժեք	ԱԱՀ	Ընդամենը	
<i>Չափաբաժին 1՝ Պահնորդական ծառայություններ</i>					
					3 583 000
1	«Պահապան 1» ՍՊԸ	2960000	592000	3552000	
2	«Քինգ Մարշալ» ՍՊԸ	2970000	594000	3564000	
3	«ՏՐԱՆՍ-ՍՖԵՐ» ՍՊԸ	3580000	0	3580000	
4	«Պրոֆ Սերվիս Սեքյուրիթի» ՍՊԸ	3800000	0	3800000	
5	«Լիոն Սեքյուրիթի Սերվիս» ՍՊԸ	3815000	763000	4578000	

Նույն արձանագրության համաձայն՝ «ԿԵԱՊ-ԳՀԾԶԲ-ԱՆՎՏ-21/14» ծածկագրով գնման ընթացակարգի ընտրված /հաղթող/ մասնակից է ճանաչվել «Պահապան-1» ՍՊԸ-ն՝ առաջարկելով պայմանագիրը կատարել 3 552 000 ՀՀ դրամ պայմանագրային գումարով:

viii. 17.02.2021թ.-ին [www.gnumner.am](http://www.gnumner.am) կայքում հրապարակվել է «ԿԵԱՊ-ԳՀԾԶԲ-ԱՆՎՏ-21/14» ծածկագրով գնման ընթացակարգի արդյունքում պայմանագիր կնքելու որոշման մասին հայտարարությունը (այսուհետ նաև՝ Հայտարարություն):

ix. Հայտարարությամբ անգործության ժամկետ է սահմանվել հայտարարությունը հրապարակվելու օրվան հաջորդող օրվանից մինչև 5-րդ օրացուցային օրը ներառյալ ընկած ժամանակահատվածը:

## **5. Բողոքներ քննող անձի հիմնավորումները և եզրահանգումը.**

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացությանը, որ «Տրանս-Սֆեր» ՍՊԸ-ի կողմից 25.02.2021թ.-ին ներկայացված բողոքն անհիմն է և ենթակա է մերժման ամբողջությամբ, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) Օրենքի 3-րդ հոդվածի 1-ին մասի 1-ին և 2-րդ մասերի համաձայն՝ օրենքի նպատակն է ապահովել գնումների գործընթացում հատուցման դիմաց արժեք, այն է՝

1) պատվիրատուին վերապահված լիազորությունների կատարման համար անհրաժեշտ՝ կարիքին համապատասխան ապրանքների, աշխատանքների և ծառայությունների ձեռքբերում՝ համարժեք հատուցմամբ:

2) գնումների և գնումների գործընթացի տնտեսող, արդյունավետ և օգտավետ իրականացում:

Նույն հոդվածի 2-րդ մասի 1-ին և 2-րդ կետերի համաձայն՝ գնումների գործընթացը հիմնվում է հետևյալ սկզբունքների վրա:

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում:

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում:

Օրենքի 7-րդ հոդվածի 1-ին մասի համաձայն՝ ցանկացած անձ, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, ունի գնման գործընթացին մասնակցելու հավասար իրավունք:

Վերոնշյալ իրավական նորմերի վերլուծության արդյունքում՝ Բողոքներ քննող անձը փաստում է, որ գնումների օրենսդրությունը, հիմնվելով գնման գործընթացի մրցակցային, թափանցիկ, համաչափ, հրապարակային, ոչ խտրական, գնման գործընթացին մասնակցելու իրավահավասարության սկզբունքների վրա, նպատակ է հետապնդում ապահովելու գնումների գործընթացում հատուցման դիմաց պատվիրատուին վերապահված լիազորությունների կատարման համար անհրաժեշտ՝ կարիքին համապատասխան ապրանքների, աշխատանքների և ծառայությունների ձեռքբերումը՝ համարժեք հատուցմամբ, և որ ամենակարևորն է՝ գնումների գործընթացի տնտեսող, արդյունավետ և օգտավետ իրականացման ապահովումը:

Բողոքներ քննող անձը հարկ է համարում հավելել, որ վերոնշյալ սկզբունքների ապահովումն ու իրականացումը գնումների օրենսդրության շրջանակներում իրացնելու համար, անհրաժեշտ պայման է նաև ցանկացած անձի՝ գնման գործընթացին մասնակցելու հավասար իրավունք ունենալու սկզբունքը՝ անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից:

Զարգացնելով վերոգրյալները՝ Բողոքներ քննող անձը փաստում է նաև, որ գնման առարկան համարժեք հատուցմամբ ձեռք բերելու նպատակը կլիներ ձևական, եթե դրան

հասնելուն ուղղված ընթացակարգերի կազմակերպումը չլինել տնտեսող, արդյունավետ և օգտավետ:

Այն է՝ ընթացակարգերի կազմակերպումը պետք է լինի՝

1. տնտեսող, այսինքն՝ նախատեսված արդյունքին կամ նպատակին հասնելու համար նախատեսված ռեսուրսների, ֆինանսական միջոցների մինիմալացմամբ՝ պահպանելով նախապես սահմանված որակը:

2. արդյունավետ, այսինքն՝ արդյունքի կամ նպատակի մասով պլանավորված և փաստացի վիճակների համեմատությունը: Նախատեսված արդյունքին կամ նպատակին հասնելու համար օգտագործված նյութական և ոչ նյութական միջոցների համարժեքությունը ձեռք բերված արդյունքին, երբ ապահովվում է կատարված ծախսի և Պատվիրատուի համար դրա օգտակարության միջև պատշաճ հարաբերակցությունը:

3. Օգտավետ՝ գնման առարկան համարժեք հատուցմամբ ձեռք բերելու նպատակով դրան հասնելուն ուղղված ընթացակարգերի արդյունքի կամ նպատակի առավելագույն մակարդակի ապահովում:

Բողոքներ քննող անձը հարկ է համարում հավելել նաև, որ իրավունքի սկզբունքները հիմնարար գաղափարներ են, որոնք արտահայտում են հասարակական կյանքի օբյեկտիվ օրինաչափությունները, ուղղակի կամ անուղղակի ամրագրվում են իրավական նորմերում, իրավական համակարգի հենասյունն են, կոչված են կարգավորելու հասարակական հարաբերությունները, ունեն համապարտադիրության հատկանիշ:

Օրենքի 28-րդ հոդվածի 1-ին մասի 10-րդ ենթակետի համաձայն՝ հրավերը պետք է պարունակի նշում այն մասին, որ առաջարկվող գինը, ապրանքների, աշխատանքների և ծառայությունների արժեքից բացի, ներառում է փոխադրման, ապահովագրման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից: Առաջարկվող գնի հաշվարկը պետք է ներկայացվի հայտով:

Օրենքի 30-րդ հոդվածի 1-ին մասի համաձայն՝ մասնակիցը հայտը ներկայացնում է հրավերով սահմանված կարգով: Հայտը ներառում է մասնակցի հաստատած՝

1) հրավերի պահանջներին իր տվյալների համապատասխանության մասին հայտարարությունը.

2) գնային առաջարկը.

3) ոչ գնային առաջարկը (տեխնիկական առաջարկ կամ տեխնիկական բնութագիր), եթե հրավերով նախատեսված է.

4) հրավերով նախատեսված այլ փաստաթղթեր (տեղեկություններ):

Օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

«Կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 2-րդ ենթակետի համաձայն՝ հրավերով նախատեսվում է նաև, որ մասնակիցը գնային առաջարկը ներկայացնում է արժեք (ինքնարժեքի և կանխատեսվող շահույթի հանրագումարը) և ավելացված արժեքի հարկ ընդհանրական բաղադրիչներից բաղկացած հաշվարկի ձևով: Արժեքի բաղադրիչների հաշվարկ՝ բացվածք կամ այլ մանրամասներ չեն պահանջվում և ներկայացվում: Եթե մասնակիցը տվյալ գործարքի գծով Հայաստանի Հանրապետության պետական բյուջե պետք է վճարի ավելացված արժեքի հարկ, ապա գնային առաջարկում առանձնացված տողով նախատեսվում է այդ հարկատեսակի գծով վճարվելիք գումարի չափը: Մասնակիցների գնային առաջարկների գնահատումն ու համեմատումն իրականացվում են առանց սույն ենթակետում նշված հարկի գումարի հաշվարկման:

«Կառվեն Եսայանի անվան պոլիկլինիկա» ՓԲԸ-ի կողմից պահնորդական ծառայությունների ձեռքբերման նպատակով 02.02.2021թ.-ին հայտարարված «ԿԵԱՊ-ԳՀԾՁԲ-ԱՆՎՏ-21/14» ծածկագրով գնանշման հարցման ընթացակարգ հրավերի (այսուհետ նաև՝ Հրավեր) 5.1 կետի համաձայն՝ առաջարկվող գինը ծառայության արժեքից բացի ներառում է փոխադրման, ապահովագրման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից: Առաջարկվող գնի հաշվարկը պետք է ներկայացվի հայտով:

Հրավերի 5.2 կետի համաձայն՝ մասնակիցը գնային առաջարկը ներկայացնում է արժեք (ինքնարժեքի և կանխատեսվող շահույթի հանրագումարը) և ավելացված արժեքի հարկ ընդհանրական բաղադրիչներից բաղկացած հաշվարկի ձևով: Արժեքի բաղադրիչների հաշվարկ՝ բացվածք կամ այլ մանրամասներ չեն պահանջվում և ներկայացվում: Եթե մասնակիցը տվյալ գործարքի գծով Հայաստանի Հանրապետության պետական բյուջե պետք է վճարի ավելացված արժեքի հարկ, ապա ներկայացվող գնային առաջարկում առանձնացված տողով նախատեսվում է այդ հարկատեսակի գծով վճարվելիք

գումարի չափը: Ընդ որում, մասնակիցների գնային առաջարկների գնահատումն ու համեմատումն իրականացվում են առանց սույն կետում նշված հարկի գումարի հաշվարկման:

Վերոնշյալ նորմերի վերլուծության արդյունքում Բողոքներ քննող անձը փաստում է, որ գնումների մասին ՀՀ օրենսդրությամբ սահմանվել է գնային առաջարկի ներկայացման համար վավերապայմաններ, համաձայն որոնց՝ գնային առաջարկը պետք է բաղկացած լինի արժեք (ինքնարժեքի և կանխատեսվող շահույթի հանրագումարը) և ավելացված արժեքի հարկի ընդհանրական բաղադրիչներից և միննույն ժամանակ՝ ներկայացված գնային առաջարկը չի կարող պակաս լինել ինքնարժեքից, որի վերաբերյալ տեղեկատվություն է պարունակում նաև հրավերը:

Սույն գործի փաստերի համաձայն՝ «Կառլեն Եսայանի անվան պոլիլիինիկա» ՓԲԸ-ի կողմից պահնորդական ծառայությունների ձեռքբերման նպատակով 02.02.2021թ.-ին հայտարարված «ԿԵԱՊ-ԳՀԾՁԲ-ԱՆՎՏ-21/14» ծածկագրով գնանշման հարցման ընթացակարգը կազմակերպվել է «Գնումների մասին» ՀՀ օրենքի 15-րդ հոդվածի 6-րդ մասի ենթակետի պահանջներին համապատասխան, որին մասնակցելու նպատակով, հայտ ներկայացրած «Պահապան-1» ՍՊԸ-ն 12.02.2021թ.-ին ժամը 15:20-ին տեղի ունեցած միաժամանակյա բանակցություններին արդյունքում ճանաչվել է «ԿԵԱՊ-ԳՀԾՁԲ-ԱՆՎՏ-21/14» ծածկագրով գնման ընթացակարգի ընտրված և հաղթող մասնակից՝ առաջարկելով պայմանագիրը կատարել 3 552 000 ՀՀ դրամ պայմանագրային գումարով, որպես առաջարկվող ծառայության ինքնարժեքի և կանխատեսվող շահույթի հանրագումար առաջարկելով 2 960 000 ՀՀ դրամ գումար:

Օրենքի 50-րդ հոդվածի 1-ին մասի 5-րդ ենթակետի համաձայն՝ գնումների հետ կապված բողոքներ քննող անձին բողոքը ներկայացվում է գրավոր, ստորագրված, դրանում ներառելով՝ ... բողոքի փաստացի և իրավական հիմքերը, ապացույցները:

Վկայակոչված հոդվածի վերլուծությունից հետևում է, որ ՀՀ գնումների հետ կապված բողոքներ քննող անձը բողոքի քննությունը հարուցում և իրականացնում է միմիայն ներկայացված բողոքի հիման վրա և ենթակա է քննության միայն դրա սահմաններում: Ընդ որում, բողոք ներկայացնելով՝ շահագրգիռ անձն ինքնուրույն է որոշում իր բողոքի պահանջի շրջանակը, ինչը տնօրինչականության սկզբունքի դրսևորման արդյունք է, որն անձի՝ ՀՀ Սահմանադրությամբ և օրենքով նրան տրված հնարավորությունն է սեփական հայեցողությամբ տնօրինելու իր նյութական և

դատավարական (ընթացակարգային) իրավունքները և դրանց պաշտպանության եղանակները:

Բողոքներ քննող անձը հարկ է համարում արձանագրել, որ բողոքի փաստացի և իրավական հիմքերը, ապացույցները ներկայացնելու պարտականությունը դրված լինելով բողոքաբերի վրա, վերջինս է հանդիսանում շահագրգիռ այն անձը, ով, ինքնուրույն որոշելով իր բողոքի պահանջի շրջանակը, պետք է բողոքի հետ միաժամանակ ներկայացնի փաստացի և իրավական հիմքերը, ապացույցները՝ որպես բողոքի բավարարմանն ուղղված էական նշանակություն ունեցող հիմքեր ու հիմնավորումներ: Ընդ որում, օրենսդիրը չի սահմանափակում բողոքի փաստացի և իրավական հիմքերը, ապացույցները ներկայացնել միայն բողոքի հետ միաժամանակ, այլև բողոքաբերը կարող է ու զրկված չէ լրացնելու/փոփոխելու/նվազեցնելու բողոքի փաստացի և իրավական հիմքերը, ապացույցները գործի քննության ընթացքում:

Վերոնշյալ իրավական նորմերի և փաստական հանգամանքների հիման վրա, դրանց համադրման արդյունքում՝ Բողոքներ քննող անձն արձանագրում է, որ տվյալ դեպքում, Բողոքաբերը, օգտվելով իրեն՝ «Գնումների մասին» ՀՀ օրենքի 46-րդ հոդվածի դրույթերով վերապահված բողոքարկման իրավունքից, իրացրել է այն՝ ներկայացնելով բողոք: Սույն գործով «Տրանս-Սֆեր» ՍՊԸ-ն, սակայն, Բողոքներ քննող անձին չի ներկայացրել որևէ վերաբերելի ապացույց առ այն, որ «Պահապան-1» ՍՊԸ-ի կողմից հայտով ներկայացված ծառայության արժեքը՝ 2 960 000 ՀՀ դրամ գումարը պակաս է փոխադրման, ապահովագրման, տուրքերի, հարկերի, այլ վճարումների գծով ծախսերի ինքնարժեքից: Ընդ որում, այդպիսի հնարավորություն Բողոքաբերն ունեցել է բողոքի քննության ընթացքում՝ մինչև որոշման կայացման պահը:

Ինչ վերաբերում է բողոքաբերի՝ հաղթող մասնակից ճանաչված ընկերության կողմից վճարման ենթակա աշխատավարձի միակողմանի կատարված հաշվարկներին, ապա Բողոքներ քննող անձը հարկ է համարում փաստել, որ այդ հանգամանքը բավարար չէ արձանագրելու, որ «Պահապան-1» ՍՊԸ-ի կողմից որպես առաջարկվող ծառայության ինքնարժեքի և կանխատեսվող շահույթի հանրագումար ներկայացված 2 960 000 ՀՀ դրամ գումար գնային առաջարկը ցածր է փոխադրման, ապահովագրման, տուրքերի, հարկերի, այլ վճարումների գծով ծախսերից և չի կարող պակաս լինել դրանց ինքնարժեքից:

Այդ հանգամանքը դիտարկելու և քննարկման առարկա դարձնելու համար անհրաժեշտ պայման է դրա ուսումնասիրության բազմակողմանիությունն ու լրիվությունը,

որը կարելի կլիներ իրականացնել միայն հաղթող ճանաչված մասնակցի կողմից ներկայացված ինքնարժեքի և կանխատեսվող շահույթի հանրագումարի բաղադրիչների հաշվարկի գնահատման արդյունքում, որոնք, սակայն, Կարգի 32-րդ կետի 2-րդ ենթակետի հիման վրա չեն պահանջվում և ներկայացվում:

Փաստերը, որոնք, օրենքի կամ նորմատիվ իրավական ակտերի համաձայն, պետք է հաստատվեն միայն որոշակի ապացույցներով, չեն կարող հաստատվել այլ ապացույցներով:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում, Բողոքներ քննող անձը հանգում է այն եզրակացության, որ «Տրանս-Սֆեր» ՍՊԸ-ի կողմից բողոքով բերված փաստերն ու հանգամանքներն անհիմն են, որպիսի պայմաններում ներկայացված բողոքն ենթակա է մերժման:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը,

### **Ո Ր Ո Շ Ե Ց**

«Տրանս-Սֆեր» ՍՊԸ-ի կողմից 25.02.2021թ.-ին ներկայացված ԳԲՔԱ-ԼՕ-2021/10 ծածկագրով բողոքը մերժել ամբողջությամբ՝ անհիմն լինելու պատճառաբանությամբ:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ  
ԲՈՂՈՔՆԵՐ ՔՆՆՈՂ ԱՆԶ՝**



**ԼԵՎՈՆ ՕՇԱՆՅԱՆ**